

Zelle – Abzählreime – conta

Eis-Keis

Eis-keis

Zwei – bei

Dri – bri

Vieré – Pieré

Fénfé – bėné

Säcksché – bäcksché

Sėbné – grėbné

Achté – bachté

Niné – biné

Zäné – Yockatriné

Angélé bangélté tumpate

Angélé bangélté tumpate

Tiffe taffe numane

Zache fanne òn rockenz bròt

Holdert us

òn d'mus éscht us.

Péter Péter pénter

Péter, Péter pénter

Tréngt de wi de wénter,

òn ém sòmmer en der gròschtò hétz

seit éer: „Jésses. Was éscht détz!“

De lib – der Körper – il corpo

Ptue d'fänschtre

Ptue d'fänschtre,

ptue d'balkna

Ptue de tér

Chére de schlössel

Lecke aposcht de schlössel

Mét den ouge

Mét den ouge tuené lògò

mét den ore tuené lòsò

mét dem mul tuené sénge

mét de bei tuené spréngé.

Mét de fiess tuené tanzo,

mét de hänn tuené patschò,

trallalero – tralla – là

trallalero – tralla – là

Schmecke tuené mét der nasò

So wie weré en lécke hasò

Géere hänné mét mim héers

Alle di das sinn mier bi

trallalero – tralla – là

trallalero – tralla – là

Dònder zwi blatte (1)

Drònder zwi blatte

druf zwi latte

druf en dielé

druf e mielé

druf en décke décke woald

òn dré tanzòt

jòng òn oalt.

Z'òndròscht zwi blattiené (2)

Z'òndròscht zwi blattiené

Òn druf zwi lattiené

Òn druf e dielé

Òn druf e mielé

Òn druf es chemmé

Òn druf zwi fänschtré

Òn druf en décke, décke woald,

doa dré tanzòt jòng òn oalt.

D'fiertaga – die Feste – le feste

O fasnachtie

O fasnachtie, o fasnachtie
Woa béscht du mòre z'nacht?

Doa embruf hénder dem gietie
Méttem strouene hieté
Òn en dorre ascht én der hann.

Tanzé tanzé

Tanzé tanzé
tanzé gern
mét e schéne jònge herr.
Aber wäres en offizier,
noch véll liebòr wäres mier.

D'familiò – die Familie – la famiglia

Dérrschid heisst mis wib

Dérrschid heisst mis wib

Lischgrénn heisst mis chénn

Lengehals heisst mis ros

Tribzue heisst min chue

Wollenzart heisst mis schoaf

Grugelégragelé heisst mis hané

Hòppé heisst mis henné

De bueb òn de attò

De bueb: Tue d'chue verchoufe, z'chalb òn z'féeld òn schéck de z'géeld nach Frauenfeld.

Der attò: Verchoufts éscht z'féeld, d'chue blibt hie òn ou z'géeld; z'chalb éscht bereits schò z'Frauenfeld.

De tieré – die Tiere – gli animali

D'geis

Jòngé òn oalté

melché òn goalté

großé òn kleiné

schené òn gmeiné

De huò

Of emmene oalte greschòneyer lérch

éscht es moal gsid en oalte huò:

mé hätter gwésst,

mé hätter gschwéget,

mé hätter gschwéget,

mé hätter gwésst.

Schloaf nenné – Schlafreime – ninnananna

Sigò Sagò (1)

Sigò sagò

Agò stragò

Guété méré

Zellen pére

D'chatzò hät gschéssét

Òf schnidersch schere

Òn de hònn läckòz ab.

Sigò Sagò (2)

Sigò Sagò

Agò stragò

Sinn zwei schoaf,

eis éscht wiss

z'andra éscht schwarz

z'wissa tuet ässe dem nenné z'nasé

Schloaf chénn schloaf (1)

Schloaf chénn schloaf

Us én der mattò (dér dòrch d'mattò) sinn kanget zwei schoaf

Eis éscht gsid es wiss

Òn z'andra éscht gsid es schwarz

Schloaf chénn schloaf

Schloaf nenné schloaf (2)

Schloaf nenné schloaf

Doa ussna sinn zwei schoaf

Es schwarz òn es wiss,

òn wenn z'nenné nid schloaft,

chénnt z'schwarz schoaf òn bisst.

Ritté ritté – Kniereterspiele – giochi

Juppi juppi rossié (1)

Juppi juppi rossié
Gadépetersch schlössié
Z'ròssié wéllt nid loufe
Òn macht trapp trapp
Òn welpt das nennélé ab.

Juppi juppi rossié (2)

Juppi juppi rossié
Ém stadal steit es schlössié
Z'rossié wéllt nid loufe
Òn z'nenné wéllts verchoufe

Ritté ritté rossié

Ritté ritté rossié
Z'Sankt Gallen steit es schlössie
Z'Sankt Gallen steit es golden hus
Lògen dri Mariélen us.
Eine spénnt de sidò,
d'andra chratzt de chridò,
de drétta spénnt de haferflock
bschétze Gott éndsche ...

Réngereie – Ringelreihen – girotondo

Réngé réngé reie

Réngé réngé reie

De techtre gangen ze meie

D'bueba gangen ze haselnòss'

Òn alle zéeme machendsch Husch! Husch! Husch!

Andersch – anderes – altro

Ziselé ... Ròmpòmpaselé ... (es lied)

De kucker òf em griene ...

Ziselé, ròmpòmpaselé, tusele, taselé rättättä ...

De kucker òf em griene - ascht.

Òn wenn tuez rägnò, wérd éer ...

Ziselé, ròmpòmpaselé, tusele, taselé rättättä ...

Òn wenn tuez rägnò, wérd éer - nass.

De kucker fléckt òber z'goldschmédsch ...

Ziselé, ròmpòmpaselé, tusele, taselé rättättä ...

De kucker fléckt òber z'goldschmédsch – hus.

Was machen wier hit zéeme?

- Was machen wier hit zéeme?
- Éch chennte es par scheité machò.
 - Was tieber mét de scheite?
 - Es firlé anprenne
 - Was tieber mét dem fierlé?
 - Z'wasser erwerme.
 - Was tieber mét dem wasser?
 - Z'bielté schliffe.
 - Was tieber de wier mét dem bielté?
 - Z'boumié felle.
 - Was tieber de mét dem boumié?
 - Z'leiterlé machò.
 - Woa gangen de wier mét dem leiterlé?
 - Em hémmel.
 - Was tieber de doa?
 - De vogaltene z'ässe gä.